

## **15. sastanak parlamenata**

**8-9. juli 2013, Brisel**

### **ZAJEDNIČKA IZJAVA**

#### **kopredsjedavajućih, pozdravljena od strane svih članova**

Po završetku parlamentarnog sastanka između Evropskog parlamenta i Parlamentarne skupštine Bosne i Hercegovine održanog 8. i 9. jula 2013. godine u Briselu, dvije delegacije:

1. snažno naglašavaju svoju podršku evropskim integracijama Bosne i Hercegovine (BiH) za dobrobit svih njenih građana.

2. smatraju da su pravo na javno okupljanje i pravo na izražavanje političkog stava osnovna i politička prava i da ostvarivanje tih prava ne smije narušavati osnovna i politička prava drugih, kao što su sloboda kretanja, pravo na rad ili političko djelovanje; pozivaju političare u BiH da razmotre, gdje je moguće, zahtjeve građana i pokažu spremnost da im obezbijede prosperitet;

3. konstatuju potrebu jačanja efikasnosti i unapređenja kvaliteta koordinacije i saradnje institucija na svim nivoima vlasti u BiH, naročito u kontekstu uspješnog izvršavanja obaveza iz Sporazuma o stabilizaciji i pridruživanju (SSP);

4. izražavaju potrebu postizanja dogovora u pogledu izvršenja presude Evropskog suda za ljudska prava u predmetu *Sejdić/Finci protiv Bosne i Hercegovine* sa ciljem stupanja na snagu SSP-a sa BiH i podnošenja prihvatljivog zahtjeva zemlje za članstvo u EU;

5. podstiču sve građane BiH, naročito političare, vjerske vođe i umjetnike, da njeguju kulturu i klimu pomirenja u BiH i regionu; pozivaju građane BiH da priznaju ratne zločine i zvjerstva koja je počinio narod kom pripadaju i uzajamno zatraže razumijevanje i oprostaj;

6. pozivaju sve političke stranke da proaktivno rade na ostvarivanju inkluzivnog i tolerantnog društva, da javno osude krivična djela počinjena iz mržnje i obezbijede adekvatnu istragu i procesuiranje pred sudom; pozivaju organe vlasti da aktivno podržavaju inicijative civilnog društva u tom polju, između ostalog i putem finansijske pomoći i političke opredijeljenosti;

7. naglašavaju značaj popisa stanovništva koji se treba izvršiti u oktobru 2013. i pozdravljaju napore koji se ulažu u to da se popis održi prema planu i u skladu sa međunarodnim standardima; apeluju na sve nadležne organe da stvore povoljan socijalni i institucionalni ambijent i izbjegavaju politizovanje popisa, čija je svrha prikupljanje objektivnih socio-ekonomskih podataka;

8. Podsjećaju organe vlasti BiH da zauzmu strateški pristup sektoru ruralnog i poljoprivrednog razvoja i stvore uslove koji će poljoprivrednim proizvođačima iz BiH omogućiti da se takmiče sa poljoprivrednim proizvođačima iz EU; stoga, pozivaju parlamente Republike Srpske i Federacije da usklade programe za poljoprivredu i ruralni razvoj sa strateškim planom BiH za poljoprivredu, koji još uvijek nije realizovan; izražavaju zabrinutost zbog nedovoljnih priprema za povlačenje sredstva iz IPARD-a i nepostojanja strategije za uspostavljanje informacionih sistema u poljoprivredi u BiH;

9. Izražavaju zabrinutost zbog visokog stepena korupcije u zemlji i njene povezanosti sa političkim strankama; pozivaju nadležna tijela da pokažu političku volju u rješavanju ovog pitanja i obezbijede sredstva za puno funkcionisanje Agencije za borbu protiv korupcije i evidenciju ostvarenih rezultata u istragama i osudama;

10. apeluju na nadležna tijela u BiH da pravosudni sistem prilagode sadašnjoj situaciji u pogledu članstva Hrvatske u EU i tako spriječe dalji gubitak izvoznih tržišta;

11. naglašavaju poziv da se dozvoli ulazak građana Kosova u BiH, pošto je BiH jedina zemlja u regionu koja ga ne dozvoljava; stoga apeluju na organe vlasti u BiH da prihvate osnovne putne isprave građana Kosova i omoguće im ulazak u zemlju, kao što su to učinile Srbija i druge zemlje;

12. pozivaju na puno sprovođenje Strategije za borbu protiv mina, kao i usvajanje zakona o borbi protiv mina sa ciljem sprečavanja novih žrtava mina;

13. apeluju na vlade na svim nivoima da održe čvrstu fiskalnu politiku; izražavaju svoju zabrinutost zbog visoke stope nezaposlenosti, posebno žena i mladih; naglašavaju uticaj političke nestabilnosti i slabe vladavine prava na rast i investicije, kao i privredni ambijent u cjelini;

14. naglašavaju potrebu unapređenja ukupnog kvaliteta školovanja sa ciljem ispunjavanja potreba domaćeg i stranog tržišta rada; pozivaju organe vlasti u BiH da otklone nedostatke u srednjem stručnom obrazovanju sa ciljem privlačenja direktnih stranih investicija.